

**Uunga siunnersuut: Unammilleqatigiinneq pillugu inatsisartut inatsisaat nr. xx
xx 2007-imeersoq.**

Kapitali 1

Anguniagaq atuuffialu

§ 1. Inatsisartut inatsisaanni anguniagaavoq unammilleqatigiilluarneq aqputigalugu inuiaqatigiit tungaasigut pisuussutinik atorluanaanissap siuarsarnissaa suliffeqarfimmut atuisunullu iluaqutaasumik.

§ 2. Inatsisartut inatsisaanni ilaapput inuutissarsiutigalugu suliffeqarfiit suusulluunniit tamarmik kiisalu pisortat aningaasaatai atorlugit inuussutissarsiutigalugu suliffeqarfimmut ikiorsiissutit.

Imm. 2. Unammilleqatigiinnermik killilersuutit pisortat aqutsinerata toqqaannartumik pisariaqartumilluunniit kingunerippagit kapitali 2-mi 3-milu malittarisassat atuutinngillat. Unammilleqatigiinnermik killiliineq kommunalbestyrelsimit aalajangerneqartoq taamaallaat pisortat aqutsinerata toqqaannartumik pisariaqartumilluunniit kingunerissavaat, unammilleqatigiinnermik killiliineq inatsisit naapertorlugit kommunalbestyrelsimut suliassiissutaasut naammassinissaannut pisariaqarsimappat.

Imm. 3. Kommunit inuussutissarsiutit siuarsarnissaannut inuussutissarsiutigalugu suliffeqarfimmut il.il. aningaasaliinikkut ikiuussinnaanerat pillugu inatsisartut inatsisaanni § 2 malillugu kommunit peqatigiillutik aalajangigaat kommunalbestyrelsip aalajangigaatut naleqartinneqarput.

Imm. 4. Unammilleqatigiinnermik killiliineq imm. 2-mut ilaanersoq pillugu naalakkersuisut aalajangiisussaaput. Naalakkersuisut pineqartoq § 17, imm. 1 malillugu Unammilleqatigiinnermut Ataatsimiititaliamit qinnuigineqaruni unammilleqatigiinnermik killiliissut imm. 2-mut ilaassanersoq, naalakkersuit Unammilleqatigiinnermut Ataatsimiititaliap qinnuteqaataata tигuneraniit kingusinnerpaamik sapaatip akunneri sisamat qaangiutsinnagit aalajangiisimassapput. Unammilleqatigiinnermut Ataatsimiititaliap ulloq akissuteqarfissaq kinguartissinnaavaa.

Imm. 5. Unammilleqatigiinnermut Ataatsimiititaliaq isumaqaruni pisortat aqutsinerat/iluarsinerat tapiissuteqarneralluunniit unammilleqatigiinnermut akornutaasunik kinguneqassasoq imaluunniit inuiaqatigiit pisuussutaasa pitsaasumik atorneqarnissaannut allatigut ajoqutaassasoq Unammilleqatigiinnermut Ataatsimiititaliaq naalakkersuisunut tunngavilersorlugu oqaaseqaateqarsinnaavoq unammilleqatigiinnermik ajoqusiisumik sunniutissai tikkuartorlugit kiisalu unammilleqatigiinnerup suliaqarfimmi siuarsarneqarsinnaanera pillugu siunnersuuteqarluni. Naalakkersuisut Unammilleqatigiinnermut Ataatsimiititaliap oqaaseqaataata tигuneraniit kingusinnerpaamik qaammatit sisamat qaangiutsinnagit Unammilleqatigiinnermut Ataatsimiititaliap oqaaseqaataa akissuteqarfигissavaa. Unammilleqatigiinnermut Ataatsimiititaliap akissuteqarfissaq kinguartissinnaavaa.

Imm. 6. Pisortaqaarfik inuutissarsiutigalugu suliffeqarfimmut aqutsisuusoq

aalajangiisartorluunniit § 17, imm. 2 malillugu aqutsineq aalajangiinerluunniit Unammilleqatigiinnermik Nakkutilliisoqarfimmut nalunaarutiginnissaaq imaattoqarsimappat:

- 1) inuussutissarsiutigalugu suliffeqarfik pisortaqarfimmit nammineq aqunneqarpat, imaluunniit,
- 2) suliffeqarfiup aqunneqarnera pisortanik peqataaffigineqarpat aammalu
- 3) aqutsineq unammilleqatigiinnermut pingaaruteqarpat.

Imm. 7. Unammilleqatigiinnermut Ataatsimiititaliaq oqaaseqartereerlugu Naalakkersuisut nalunaartussaataaneq pillugu malittarisassiussapput, tamatumani ilangullugit nalunaartussaataanerup annertussusia pillugu malittarisassat.

§ 3. Akissarsiat sulinernullu tunngasut Inatsisartut inatsisaanni ilaanngillat. Unammilleqatigiinnernulli Ataatsimiititaliap sulinermini atugassatut kattuffiit suliffeqarfiillu akissarsiat sulinernullu tunngasut pillugit paasissutisseeqqusinnaavai.

§ 4. Kapitali 2-mi aalajangersakkat suliffeqarfimmi koncernimiluunniit tassanerpiaq isumaqatigiissutinut, aalajangikkanut ataatsimoortumilluunniit ulluinnarni ingerlatseriaatsinut atuutinngillat.

Imm. 2. Unammilleqatigiinnermut Ataatsimiititaliaq oqaaseqartereerlugu Naalakkersuisut imm. 1-ip atornissaanut malittarisassiorsinnaapput, tamatumani ilanngullugit suliffeqarfiup koncernilluunniit taannarpiaap iluani isumaqatigiissutit, akuersissutit aamma ataatsimoortumik periutsit qanoq paasineqarnissaanut malittarisassat.

§ 5. Piserusussutsip neqerooruteqarsinnaassutsillu unammillersinnaasullu misissorneqarnerat tunngavigalugu Inatsisartut inatsisaat manna malillugu niuerfissat piukkunnartut killeqartitaanerat pisassaaq. Niuerfimmi piukkunnartumi suliffeqarfiit peqataasut inissisimanerat uppersarsarneqareerpat unammilleqatigiissinnaassuseq misissorneqassaaq, inissisimaneratalu pisariaqartippagu Inatsisartut inatsisaat unioqqutinneqarnera soq nalilerneqassalluni.

Imm. 2. Imm. 1 malillugu naliliinermut atatillugu Unammilleqatigiinnermut Ataatsimiititaliaq suliamut ilisimasalinnik avataaneersunik suleqateqarsinnaavoq.

Kapitali 2

Unammilleqatigiinnermik killiliisunik isumaqatigiissuteqarnerup inerteqqutaanera

§ 6. Suliffeqarfiit toqqaannartumik toqqaannangitsumilluunniit unammilleqatigiinnerup killilernissaanik taamatulluunniit kinguneqartussanik isumaqatigiissuteqaqqusaanngillat.

Imm. 2. Imm. 1 malillugu isumaqatigiissutit makkuninnga imaqarsinnaapput:

- 1) Pisinermi tunisaqarnermiluunniit akit imaluunniit niuernermi piumasat allat pillugit aalajangersaaneq.
- 2) Nioqqutissiornerup, tunisaqartarnerup, teknikkikkut ineriartornerup aningaasaliisarneru-rulluunniit killilernerat aqunnerallu.
- 3) Niuerfiit pilersuisoqarfiillu aggulunnerat.
- 4) Sullissinerit assigiimmik nalillit niueqatinut naligiinngitsunik

piumasaqarfigineqarnerat, taamaalillutik unammilleqatigiinnermi pitsaanginnerusunik atugassaqalerlutik.

5) Isumaqatigiissuteqarnermi piumasarissallugu isumaqatigiissuteqarfigisap ilassummik tunniussaqaarnissaq akuerissagaa, suussutsimikkut imaluunniit niuernermi periutsit malillugit isumaqatigiissutip suuneranut tunngassuteqanngitsumik.

6) Suliffeqarfiit marluk amerlanerusulluunniit joint venturimik pilersitsinikkut unammilleqatigiinnikkut periutsitik ataqatigiiaassagaat.

7) Tuniseqqittarnermut akit pituttuutaasumik aalajangerneqarnerat imaluunniit niueqat ataaseq arlallilluunniit akissatut inassutaasunik saneqqusseqqunagit.

Imm. 3. Imm. 1 aamma atuuppoq suliffeqarfiit kattuffiisa aalajangiinerinut suliffeqarfiillu akornanni ataatsimoortumik ingerlatsinerinut.

Imm. 4. § 6, imm. 1-ip unioqquatinneqartarnera unitsinniarlugu

Unammilleqatigiinnermut Ataatsimiititaliaq peqqussuteqarsinnaavoq § 19 malillugu.

Unammilleqatigiinnermut Ataatsimiititaliap imm. 1-imut tunngatillugu nalornissutai akuersaarumallugit aamma ataatsimiititaliap suliffeqarfiup neriorsutai pituttuisunngortissinnaavai, tak. § 20.

Imm. 5. Imm. 1-3 malillugit isumaqatigiissutit aalajangikkallu inerteqqutaasut atorsinnaassanngillat, § 7 malillugu ilaasussaataaangikkunik, § 8 malillugu ilaassanngikkunik, § 9 malillugu nalunaarummut ilaangikkunik imaluunniit § 10 malillugu ataatsimoorlutik ilaatitaangikkunik.

§ 7. § 6, imm. 1-imi inerteqqut atuutinngilaq imaattoqarsimappat:

1) Isumaqatigiissuteqatigiit niuernikkut pissarseqataassutaat niuerfissaqqissuni isumaqatigiissummut atasuni 10 procenti sinnerlugu annertussuseqanngippata, isumaqatigiissut suliffeqarfiit niuerfimmi unammilleqataavissunut unammilleqataalersinnaasunulluunniit isumaqatigiissutaasimappat, tamaattoq takuuk imm. 2-3,

2) Isumaqatigiissummi niuerfinni piukkunnartuni usumaqatigiissuteqarfigisat ataasiakkaat niuerfimmi piukkunnartumi pissarseqataassutaat 15 procentimit annerunngippat suliffeqarfiit niuerfimmi pineqartumi unammilleqatigiittut unammilleqatigiilersinnaasulluunniit pineqartillugut, taamaattoq takuuk imm. 2 aamma 3,

3) Isumaqatigiissuteqatigiit katillugit kaaviiartitaasa 5 million kr.-nit sinnersimassanngikkaat, tamaattoq takuuk imm. 2, 3 aamma 4.

Imm. 2. Imm. 1-imi atortuutitsinnginneq atuutinngilaq imatut pissutsit ippata:

1) Suliffeqarfiit imaluunniit suliffeqarfiit kattuteqatigiissut nioqquutissanik sullissinernilluunniit tunisinermut tuniseqqinnermulluunniit akit, iluanaarutissat isumaqatigiissutigisimappatigit, ataatsimut aqqissussimappatigit akuersissutigisimappatigilluunniit.

2) suliffeqarfiit marluk arlallilluunniit isumaqatigiissuteqarnermikkut neqeroorutit sioqqutsisumik iluarsisuteqartikkaat taamaaliorniarsarisulluunniit, neqeroorutit ammarnissaannut piumasaasut aalajangersaraat taamaaliorniarsarisulluunniit, neqeroorutit kinguartikkaat taamaaliorniarsarisulluunniit, neqeroorutit sioqqutsisumik nalunaarutiginnissaannut imminnut pisussaattitut imaluunniit allatigut imminnut pisussaattitut neqerooruteqannginnermi suleqatigiinniarlutik.

Imm. 3. § 6 imm.1-imi inerteqqut atuuppoq suliffeqarfiit akornanni isumaqatigiissutinut, suliffeqarfiit kattuteqatigiit aalajangigaannut suliffeqarfiillu

akunnerminni ataqatigiiaakkamik periuseqarpata, periuserlu taanna isumaqatigiissutinut assingusunut, akuersissutinut imaluunniit ataatsimoortumik periutsinut unammilleqatigiinnermik killiliisuuppata.

Imm. 4. Isumaqatigiissut unammilleqatigiit unammilleqatigiinngitsulluunniit akornanni isumaqatigiissutaanersoq sunaassusersiuminaappat nalinganut killissarititaq 10 procent atuuppoq.

Imm. 5. Imm. 1-imi immikkoortillugit ilaanngitsut atuupput, nr. 1-imi 2-milu niuernermi peqataa-nerup annertussusia qummut killissarititaasut 10 procent aamma 15 procentiusut ukiuni tulleriiginnarni marlunni 2 procentpoint sinnerlugit qaffariarsimangippata.

Imm. 6. Unammilleqatigiinnermut Ataatsimiititaliaq oqaaseqartereerlugu Naalakkersuisut imm. 1, nr. 3 malillugu kaaviiaartitat naatsorsortarnerannut malittarisassanik kiisalu niuernermi peqataassutit imm. 1, nr. 1 aamma 2-miittut, tak. imm. 5, minnerusumik qummut killingata qaangerneqarnerata ilaatinneqannginnissaa pillugu malittarisassanik aalajangersaasinnaapput.

§ 8. Unammilleqatigiinnermut Ataatsimiititaliap nalunaaruteqareerluni § 6, imm. 1-imi inerteqqut atorunnaarsissinnaavaa, suliffeqarfiit akornanni isumaqatigiissutit, suliffeqarfiit kattuteqatigiissut iluanni aalajangikkat imaluunniit suliffeqarfiit akornanni ulluinnarni ingerlatseriaatsit ataqatigiiaakkat tungaasigut Unammilleqatigiinnermut Ataatsimiititaliaq isumaqaruni makkunatigut iluaqutaasut:

- 1) nioqutissiornermi imaluunniit nioqutissanik sullissinernillu avammut ingerlatitseqqittarnermi imaluunniit teknikkikkut aningaasatigullu ineriartornermi pitsanngorsaannermut nukittorsaaqataasoq,
- 2) atuisartut iluaqutaasunit naapertuuttumik pissarseqataasut,
- 3) suliffeqarfiit taakkua anguniarnerannut pisariaqanngitsumik killilersorneqanngitsut, aammalu
- 4) nioqutissat sullissinerillu annertunersaat pillugit suliffeqarfiit unammillersinnaajunnaarsinne-qassanngitsut.

Imm. 2. Imm. 1 malillugu ilanngunneqannginnissamik qinnuteqarluni isumaqatigiissut pineqartoq, akuersissut imaluunniit periuseq ataqatigiiaagaq Unammilleqatigiinnermik Nakkutilliisoqarfimmuq tunniunneqassapput.

Unammilleqatigiinnermut Ataatsimiititaliaq nalunaaruteqartarnek pillugu malittarisassiussaaq, nalunaarnermut immersugassat immikkut ittut ilanngullugit.

Imm. 3. Imm. 1 malillugu aalajangikkani nalunaarneqassaaq ilaatinneqannginnissaaq qanoq sivistigisumik atuutissanersoq. Ilaatitaannginneq siusinnerpaamik piffissamit nalunaarfimmiit atuutilersinnaavoq. Ilaatitaannginneq piumasaqaatilerlugu nalunaarutigineqarsinnaavoq.

Imm. 4. Nalunaaruteqarnerup kingornatigut Unammilleqatigiinnermut Ataatsimiititaliap ilaatitaannginneq sivitsorsinnaavaa, Unammilleqatigiinnermut Ataatsimiititaliaq isumaqaruni imm. 1-mi piumasaasut suli atuuttut. Imm. 3 taamaaqataanik atorneqassaaq.

Imm. 5. Unammilleqatigiinnermut Ataatsimiititaliap imm. 1 imaluunniit imm. 4 malillugit aalajangikkat allanngortissinnaavai imaluunniit utertissinnaavai pissutsit imaappata:

- 1) Aalajangiinnermut pingaarutilimmuq aalajangersimasumut tunngatillugu pissusiviusut allanngorsimappata.
- 2) Isumaqatigiissummut, akuersissummut imaluunniit periutsimut

ataqatigiiaakkamut peqataasut piumasarianut malinnaangippata.

3) Isumaqatigiissummut, akuersissummut imaluunniit periutsumut ataqatigiiaakkamut peqataasunit eqqunngitsumik paasinerlutassamilluunniit paasissutissiisimaneq tunngavigalugu aalajangiisoqarsimappat.

§ 9. Unammilleqatigiinnermut Ataatsimiititaliap suliffeqarfiup imaluunniit suliffeqarfiit kattuttut nalunaaruteqareernerisigut nalunaarutigisinnaavaa isumaqatigiissut, aalajangigaq imaluunniit periuseq ataqatigiiaagaq pissutsit Unammilleqatigiinnermut Ataatsimiititaliap nalunngisai malillugit § 6, imm. 1-imi inerteqqummut ilaangitsut, taamaattumillu § 6, imm. 4 malillugu peqqussuteqarnissamut tunngavissaqanngitsaq. Unammilleqatigiinnermut Ataatsimiititaliaq nalunaartarneq pillugu malittarisassiussaq, tamatumani ilanngullugit nalunaarnermut immersugassat immikkut ittut atornissaannut malittarisassat.

§ 10. Naalackersuisut Unammilleqatigiinnermut Ataatsimiititaliamit oqaaseqaatinik piniareernermigut isumaqatigiissutit, aalajangikkat aamma periutsit ataqatigiiaakkat ataatsimoortut aammalu § 8, imm. 1-imi piumasaqaatinut naammassinnissimasut § 6, imm. 1 malillugu inerteqqummiittut ilaatinneqannginnissaannut malittarisassanik aalajangersaasinnaapput.

Stk. 2. Suliffeqarfiit kattuttut imaluunniit periutsit ataqatigiissut iluanni isumaqatigiissutit akuersissutilluunniit imm. 1 malillugu ataatsimoortumik ilaatitaannginnissamut ilaatinneqartut ataasiaannartumik § 8, imm. 1-imi piumasaqaatinut akuerineqarsinnaangippata, Unammilleqatigiinnermut Ataatsimiititaliaq suliffeqarfinnut isumaqatigiissummut ilaasunut ataatsimoortumik ilaatitsinngitsoorsinnaavoq.

Kapitali 3

Salliulluni inissisimanermik atornerluineq

§ 11. Salliulluni inissisimanerup atornerlunnissaa suliffeqarfimmut ataatsimut arlalinnuunniit inerteqqutaavoq.

Imm. 2. Imm. 1 malillugu atornerluineq soorlu makkunatigut pisinnaavoq:

1) Pisinermi tunisinermilu akit naleqqutinngitsut imaluunniit niuernermi piumasaasut allat naleqqutinngitsut toqqaannartumik toqqaannanngitsumilluunniit pinngitsaaliissutiginerat.

2) Atuisunut ajoqutaasumik nioqqutissiornerup, tunisisarnerup imaluunniit teknikkikkut ineriartornerup killilerneqarnerat,

3) Sullissinernut assigiimmik nalilinnut atugassarititat naligiinngitsut niueqatinut atortitaanerat, taamaalillutik taakkua unammilleqatigiinnermi ajornerusumik inissisimalerlutik,

4) Isumaqatigiissummi atugassarisatut piumasarineqarpat isumaqatigiissuteqarfigisap akuerissagai ilassummik akiliutit suussusertik malillugu imaluunniit niuernermi periutsit malillugit isumaqatigiissutip suuneranut tunngassuteqanngitsut.

Imm. 3. Imm. 1-imi unioqqutitsinerit unitsinniarlugit Unammilleqatigiinnermut

Ataatsimiititaliaq peqqussuteqarsinnaavoq, tak. § 19. Unammilleqatigiinnermut Ataatsimiititaliap imm. 1-imut tunngatillugu nalornisoorutai akuersaarneqaqqullugit ataatsimiititaliap aamma suliffeqarfiup neriorsuutai pituttuisunngortissinnaavai, tak. § 20.

Imm. 4. Suliffeqarfiup ataatsip arlallilluunniit nalunaaruteqareernerisigut Unammilleqatigiinnermut Ataatsimiititaliap nalunaarutigisinnaavaa pissutsit Unammilleqatigiinnermut Ataatsimiititaliap nalunngisai malillugit iliuseq aalajangersimasoq imm. 1-mut atanngitsoq, taamaattumillu imm. 3 malillugu peqqussuteqarnissamut tunngavissaqanngitsoq.

Imm. 5. Unammilleqatigiinnermut Ataatsimiititaliap aperineqaruni nalunaarutigissavaa suliffeqarfik ataaseq arlallilluunniit salliullutik sutigut inissisimanersut. Unammilleqatigiinnermut Ataatsimiititaliap nalunaarutigippagu suliffeqarfik salliulluni inissisimanngitsoq nalunaarut pituttuisuussaaq Unammilleqatigiinnermut Ataatsimiititaliamit utertinneqarnissaata tungaanut.

Imm. 6. Imm. 4 imaluunniit 5 malillugit aalajangiinissamut atorussat pigineqarnissaat pillugit Unammilleqatigiinnermut Ataatsimiititaliaq malittarisassiorsinnaavoq.

Kapitali 4

Tapiissutit unammilleqatigiinnermik equititsisut

§ 12. Unammilleqatigiinnermut Ataatsimiititaliap peqqussutigisinnaavaa pisortat aningaasaataat atorlugit suliffeqarfinnut aalajangersimasunut tapiissutaasimasut unitsinneqassasut utertillugilluunniit akilernerqassasut.

Imm. 2. Tapiissutit imaassimappata peqqussuteqartoqarsinnaavoq:

1) toqqaannartumik toqqaannanngitsumilluunniit siunertaalluni unammilleqatigiinnerup equitinnissaa aamma

2) pisortat aqutsinerat naapertorlugu inatsisinik unioqqutitsineruppat.

Imm. 3. Tapiissutit pisortat aqutsinerat naapertorlugu inatsisinik eqqortitsinerunersoq pillugu aalajangiisussaapput naalakkersuisut imaluunniit kommunimi nakkutilliisoqarfik pineqartoq, inatsisit allat malitsiginngippassuk. Aalajangiineq pissaaq ataatsimiititaliap qinnuiginninnerata tigungeraniit kingusinnerpaamik sapaatip akunneri sisamat qaangiutsinnagit. Unammilleqatigiinnermut Ataatsimiititaliap piffissaliussaq sivitsorsinnaavaa.

Imm. 4. Tapiissutit utertillugit akilernissaannik peqqussuteqarfigineqarsinnaapput inuutissarsiutigalugu suliffeqarfiit namminersortunit pigineqartut, suliffeqarfiit imminnut pigisut kiisalu suliffeqarfiit tamakkiisumik ilaannakortumilluunniit pisortanit pigineqarlutik ingerlatseqatigiiffittut ingerlasuusut. Naalakkersuisut imm. 1 malillugu tapiissutit utertillugit akilernissaannik peqqussut aamma suliffeqarfinnut ingerlatseqatigiiffittut isikkulimmik ingerlatanut pisortanit tamakkiisumik ilaannakortumilluunniit pigineqartunut aalajangersimasunut tutsinneqarsinnaanersoq malittarisassiorfigisinnaavaat.

Imm. 5. Unammilleqatigiinnermut Ataatsimiititaliap pisortat tapiissutaasa utertillugit akilernissaannut peqqussuteqarsinnaatitaanera tapiissutit tunniunneqarnerata kingornatigut ukiut tallimat qaangiunneranni pisoqaavallaalissaaq. Piffissaliussaq atorussaajunnaarsinneqarsinnaavoq Unammilleqatigiinnermut Ataatsimiititaliap

namminerisaminik imaluunniit maalaaruteqarneq tunngavigalugu suliamik aallartitsisoqarneraniit ataatsimiititaliap aalajangiinissaanut tungaanut. Utertillugit akilikkat erniaat Unammilleqatigiinnermut Ataatsimiitiliap naatsorsuusiussavai kingusinaarluni akiliutit il.il. pillugit inatsisartut inatsisaat malillugu, tamatumani ilanngullugu ernialersuineq pisinnaasoq unammilleqatigiinnermik equtitsisumik tapiissutip tunniunneqarfianiit.

Imm. 6. Nalunaareernerup kingornatigut Unammilleqatigiinnermut Ataatsimiititaliap pisortanit tapiissutinut pissutsinik ilisimaqarnini tunngavigalugu imm. 2, nr. 1-imut tapiissutit ilaanngitsut nalunaarutigisinnaavaa, taamaammallu peqqussuteqarnissamut tunngavissaqanngitsoq. Unammilleqatigiinnermut Ataatsimiititaliaq nalunaartarneq pillugu malittarisassiorsinnaavoq, tamatumani ilanngullugu nalunaaruteqarnermut immersugassat immikkut ittut atorneqarnissaat.

§ 13. Kommunit, inuutissarsiutigalugu suliffeqarfimmut aningaasaliinertigut inuutissarsiornerup ineriartortinnissaanut kommuunit peqataasinnaanerat pillugu inatsisartut inatsisaat malillugu, inuutissarsiornermut aningaasaliiniarlutik pilersaaruteqartut aningaasaliitinnatik, aningaasaliinissamut pilersaarut Unammilleqatigiinnermik Nakkutilliisoqarfimmut saqqummiutissavaat, taassumalu sioqqutsisumik neriorsuutigalugu nalunaarutigisinnaavaa pissutsit Unammilleqatigiinnermik Nakkutilliisoqarfiup ilisimalersimasai malillugit § 12, imm. 2-mi pineqartutut unammilleqatigiinnermik equtitsisumik tapiissuteqartoqanngitsoq.

Imm. 2. Kommunit Unammilleqatigiinnermik Nakkutilliisoqarfianit sioqqutsisumik neriorsuummik piniarnissamik pisussaaffeqarnerat pillugu naalackersuisut malittarisassiussapput kiisalu malittarisassiussallutik kommunini nakkutilliisoqarfiit Unammilleqatigiinnermik Nakkutilliisoqarfiullu akornanni suleqatigiinnissap aaqqissuuneqarnissaannik.

Kapitali 5

Kattunnerit il.il. nalunaarutigineqarnerat

§ 14. Kattussinerit, suliffeqarfiit tiguneqarneri suliffeqarfiillu kattunneqarneri Unammilleqatigiinnermik Nakkutilliisoqarfimmut nalunaarutigineqassapput. Tamannali atuutinngilaq kattunneq, suliffeqarfiit tiguneqarnerat suliffeqarfiilluunniit kattunneqarnerat pisimappat suliffeqarfiup anaanaasup suliffeqarfiillu allequtaasut akornanni imaluunniit koncernimi tassanerpiaq suliffeqarfiit allequtaasut akornanni.

Imm. 2. Unammilleqatigiinnermut Ataatsimiititaliaq oqaaseqartererlugu Naalackersuisut nalunaartussaataaneq pillugu malittarisassiussapput, tamatumani ilanngullugit kattunnerit ilaat, suliffeqarfinnik tigusinerit kattussinerillu nalunaarutigineqartariaqannginnerat pillugit malittarisassat.

Kapitali 6

Tamanut ammasuuneq sulianillu ilisimasaqarneq

§ 15. Pisortat aqutsinerat pillugu inatsisartut inatsisaat inatsit manna malillugu sulianut atuutinngilaq, taamaallaalli atuullutik suliat malittarisassat aalajangersarnerannut tunngasut ukua malillugit: § 2, imm. 7, § 4, imm. 2, § 7, imm. 6, § 8, imm. 2, 2. pkt., § 9, 2. pkt., § 10, imm. 1, § 11, imm. 6, § 12, imm. 4, 2. pkt., aamma imm. 6, 2. pkt., § 13, imm. 2, § 14, imm.2, § 17, imm. 3 aamma § 25, imm. 3. Taamaattoq pisortat aqutsinerat pillugu inatsisartut inatsisaanni § 4, imm. 2 aamma § 6 Inatsisartut inatsisaat manna malillugu sulianut atorneqassaaq. 1. aamma 2. pkt. aamma atuutissapput paasissutissat Inatsisartut inatsisaat manna atorlugu paasissutissat pissarsiarineqartut aqutsisoqarfimmut allamut tunniunneqarsimatillugit.

Imm. 2. § 2, imm. 4, 1. pkt. aamma § 12, imm.3, 1. pkt., malillugit naalakkersuisut aalajangiineri, § 2, imm. 6, malillugit nalunaarutit, Unammilleqatigiinnermut Ataatsimiititaliap oqaaseqaatai tunngavilersukkat naalakkersuisullu § 2, imm. 5 malillugu akissutai, Unammilleqatigiinnermi Ataatsimiititaliap §13, stk 1 malillugu sioqqutsisumik neriorsuuteqarsimanerannik, kiisalu Unammilleqatigiinnermut Ataatsimiititaliap Inatsisartut inatsisaat malillugu aalajangiineri tamanut saqqummiunneqassapput. Aamma Unammilleqatigiinnermik Nakkutilliisoqarfiup Unammilleqatigiinnermut Ataatsimiititaliaq sinnerlugu aalajangigai tamanut saqqummiunneqassapput, unammilleqatigiinneq pillugu inatsisip paasineqarnissaata pingaaruteqarneranut imaluunniit allatigut kikkunnut tamanut soqutiginaateqarneranut isumaqartoqarpat. § 29 innersuussutigalugu suliani akiliisitsinissaq aalajangerneqarpat eqqartuussut, akiliutip akuerineqarnera imaluunniit tamatuma eqikkarneqarnera tamanut saqqummiunneqassapput.

Imm. 3. Unammilleqatigiinnermut Ataatsimiititaliap sulinera pillugu paasissutissat nalinginnaasumillu nassuiaatit Unammilleqatigiinnermut Ataatsimiititaliap tamanut saqqummiussinnaavai.

Imm. 4. Imm. 2 aamma 3 malillugit tamanut saqqummiussinerni paasissutissat teknikkimut tunngasut, tamatumani ilanngullugit ilisimatusarluni misissuineq, nioqqutissioriaaseq, kiisalu ingerlatsineranut niuernermullu tunngatillugu isertugaasut tamanut saqqummiunneqassanngillat, paasissutissat inummut suliffeqarfimmulluunniit paasissutissani pineqartumut aningaasatigut annertuumik pingaaruteqarpata. Aamma suliffeqarfimmi Finanstilsynemit nakkutigineqartumi sullitanut ataasiakkaanut paasissutissat tamanut saqqummiunneqassanngillat.

Imm. 5. Inuup Unammilleqatigiinnermut Ataatsimiititaliamut paasissutissiisussap ataatsimiititaliap siulittaasuanut piumasarisinnaavaa imm. 4 malillugu paasissutissat tamanut saqqummiunneqassanngitsut aammalu ataatsimiititaliami ilaasortanut allanut tunniunneqassanngitsut. Siulittaasup inaarutaasumik aalajangissavaa paasissutissat qanoq annertutigisumik qanorlu isikkulerlugit tamanut saqqummiunneqassanersut.

§ 16. Pisortat suliffeqarfiini suliat suliarineqartarnerat pillugu Inatsisartut inatsisaat manna malillugu sulianut atuuppooq. Suliani suliat suliarineqartarnerat pillugu inatsit malillugu peqataasut tusarniaaffigineqartarsinnaaneratt missingiummi tamarmi aalajangiiffissatut ilaavoq. Oqaaseqaateqarnissaq minnerpaamik sapaatip akunnerinik pingasunik sivissuseqassaaq, suliaq Unammilleqatigiinnermut Ataatsimiititaliamut saqqummiunneqareersimangippat.

Kapitali 7

Unammilleqatigiinnermut oqartussaaso, aaqqissugaaneq pisinnaatitaaffiillu

§ 17. Unammilleqatigiinnermut Ataatsimiititaliap nakkutigaa Inatsisartut inatsisaata matuma Inatsisartullu inatsisaat malillugit maleruagassiat malinneqarnissaat, taamaattorli takukkit § 2, imm. 4,1.pkt. aamma § 12, imm. 3, 1. pkt. Unammilleqatigiinnermut Ataatsimiititaliap suliaq nammineerluni, nalunaaruteqareernikkut imaluunniit naammagittaalliortoqarneratigut, suliarisinnaavaa. Unammilleqatigiinnermut Ataatsimiititaliap aalajangissavaa suliap misissornissaanut aalajangiiffiginissaanulluunniit naammattumik patsisissaqarnerasoq, tamatumani ilanngullugu suliap suliarinera unitsikkallarnejassanersoq unitsinneqavissanersorluunniit. Aamma Unammilleqatigiinnermut Ataatsimiititaliaq aalajangersinnaavoq suliaasaq suliariniarnagu suliffeqarfiit § 20 malillugu siusinnerusukkut neriorsuereersimappata.

Imm. 2. Unammilleqatigiinnermik Nakkutilliisoqarfik Unammilleqatigiinnermut Ataatsimiititaliamut allattoqarfiuvoq Inatsisartut inatsisaat manna tunngavigalugu sulianut Inatsisartut inatsisaatalu atuutinnera ulluinnarni allaffissornikkut ataatsimiititaliaq sinnerlugu isumagisaralugu.

Imm. 3. Naalackersuisut Unammilleqatigiinnermut Ataatsimiititaliap suleriaasia aamma Unammilleqatigiinnermut Ataatsimiititaliap aamma Unammilleqatigiinnermik Nakkutilliisoqarfiup sulinerannut malittarisassat sukumiinerusut, Unammilleqatigiinnermut Ataatsimiititaliap ilaasortassaasa toqqarneqarnissaannut inassuteqaatit, Unammilleqatigiinnermut Ataatsimiititaliap siulittaasuata inassuteqarneratigut Unammilleqatigiinnermut Ataatsimiititaliami ilaasortat qinigaaffiup naannginnerani soraarsitaanissaannut malittarisassat kiisalu ataatsimiititaliami ilaasortat akissarsiaqartitaanissaat pillugu malittarisassat Inatsisartunut Naalackersuisunullu il.il. ilaasortat akissarsiaqartitaanerat pillugu Inatsisartut inatsisaat naapertorlugu akissarsiaqartitaanissaannut malittarisassat aalajangersassavaat.

§ 18. Unammilleqatigiinnermut Ataatsimiititaliami ilaasortaapput siulittaasoq ilaasortallu arfinillit. Ataatsimiititaliap siulittaasua ilaasortaalu Naalackersuisunit ukiunut sisamanut toqqarneqassapput. Ataatsimiititaliami ilaasortat ilaqassapput pisortat namminersorlunilu inuutissarsiutigalugu suliffeqarfiinik ingerlataannik ilisimasaqarluartunik, tamatumani ilanngullugit inatsisilerinnermut, aningaasanut, aningaasaqarnermut atuisullu soqutigisaannut tunngasunik ilisimasallit. Siulittaasoq ataatsimiititaliamilu ilaasortat pingasut inuussutissarsiornermut atuisullu soqutigisaannut attuumassuteqassanngillat. Naalackersuisut toqqartussaavaat ilaasortaq ataaseq inuussutissarsiortut kattuffiinit inassutigineqartoq, atuisartut kattuffiisa inassuteqarneratigut ilaasortaq ataaseq, aamma naalackersuisut KANUKOKA-llu peqatigiillutik inassuteqarneratigut ilaasortaq ataaseq pisortat inuutissarsiornikkut ingerlatsinerannik immikkut ilisimasaqarluartoq. Ataatsimiititaliamut ilaasortat inuttut suliaassamullu piginnaasaqarluarnertik tunngavigalugu toqqarneqassapput, atorfitsillu attuumassuteqarfiginagit sulissallutik.

§ 19. Unammilleqatigiinnermut killilersuutit sunniutaat ajoqutaasut unitsinnissaat siunertaralugu Unammilleqatigiinnermut Ataatsimiititaliap § 6, imm. 4, 1.pkt.

imaluunniit § 11, imm. 3, 1. pkt. malillugit peqqussutigisinnaasai ilaatigut makkuusinnaapput:

- 1) Isumaqatigiissutit, aalajangikkat, niuernermi piumasaasut tamakkiisumik ilaannakortumilluunniit atorunnaarsinnerat.
- 2) Akit iluanaarutissallu qummut qaangerneqannginnissaat, imaluunniit akit iluanaarutissallu naatsorsorneranni naatsorsueriaatsimut malittarisassat aalajangersimasut atorneqassasut.
- 3) Suliffeqarfiup ataatsip arlallilluunniit pineqartut taamaaqataanik tunisinermut suliffeqarfiup atugasaritittagai atuuttut atorlugit pisisunut sukumiinerusumik taasanut tuniseqqusaanerat. Suliffeqarfiulli tamatigut piumasarisinnaavaa aningaasanngorlugu akilernerqarnissaq imaluunniit tutsuiginartumik qularnaveeqqusiinissaq.
- 4) Nioqqutissaq sullissinerluunniit neqeroorutigisinnaajumallugit attaveqatigiinnermi atortunut periarfissaqartitsisinnaanissaq.
- 5) Niueqatigiinnermi piumasaasut nalinginnaasut Unammilleqatigiinnermik Nakkutilliisoqarfimmut nalunaarutigeqqusaanerat.

Imm. 2. Imm. 1, nr. 5 malillugu peqqussut piffissamit aalajangiiviffimmiit ukiuni marlunni atuuppoq.

§ 20. Suliffeqarfiit neriorsuutaat Unammilleqatigiinnermut Ataatsimiititaliap § 6, imm. 1-mut imaluunniit § 11, imm. 1-imut tunngatillugu nalorninartoqartitaanik iluarsiissutaasut ataatsimiititaliamit suliffeqarfimmut pituttuisunngortinneqarsinnaapput. Neriorsuut aalajangersimasumik sivisussusilerneqarsinnaavoq.

Imm. 2. Neriorsuut imm. 1 malillugu pituttuisunngortitaareerpat Unammilleqatigiinnermut Ataatsimiititaliaq neriorsuutaasut piffissaq eqqorlugu eqqortumillu naammassineqarnissaat qulakkeerumallugu pisariaqartunik peqqussuteqarsinnaavoq.

Imm. 3. Unammilleqatigiinnermut Ataatsimiititaliap imm. 1 malillugu aalajangiineq utertissinnaavaa imaattoqarpat:

- 1) Aalajangiinnermut tunngatillugu pissusiviusut pingaarutilimmik allannguuteqarsimappata.
- 2) Isumaqatigiissummi, isumaqatigiissummi imaluunniit periutsini ataqatigiissuni peqataasut neriorsuutit akerliannik iliorpata.
- 3) Isumaqatigiissummi, isumaqatigiissummi imaluunniit periutsini ataqatigiissuni peqataasut eqqunngitsumik paatsiveerutitsisumilluunniit ilisimatitsinerat tunngavigalugu aalajangiisoqarsimappat.

§ 21. Unammilleqatigiinnermut Ataatsimiititaliaq paasissutissanik piumasaqarsinnaavoq, tamatumani ilanngullugit naatsorsuutit, naatsorsuusiornermut atortut, allattugaatit assilineri, niuernermi pappiarat allat qarasaasiatigullu paasissutissiat katersukkat, tassani ataatsimiititaliap sulineranut imaluunniit Inatsisartut inatsisaanni aalajangersakkanut ilaanersut aalajangiiffigineqassammata.

§ 22. Unammilleqatigiinnermut Nakkutilliisoqarfik Unammilleqatigiinnermut Ataatsimiititaliap sulineranut atortussatut nakkutilliilluni misissuisinnaavoq, tamatumalu kingunerissallugu Nakkutilliinermik Nakkutilliisoqarfiup suliffeqarfiup suliffeqarfiilluunniit kattuttut allaffeqarfii angallassinermullu atortui paasisaqarfigiumallugit iserfigisinnaallugit paasissutissallu tamarmiusut assilineri

piumallugit, taakkununga ilanngullugit naatsorsuutit, naatsorsuusiordermi atortussat, allattukkat niuernermilu pappiarat allat, suminngaanneersuuneri apeqqutaatinnagit. Nakkutilliilluni misissuinnermut atatillugu Unammilleqatigiinnermik Nakkutilliisoqarfiup oqaasiinnartigut nasuiaanneqarnissaq piumasarisinnaavaa, tassanilu piumasarlugu inuit nakkutilliilluni misissuinnermut peqataasut kaasarfitik, taskitik il.il. sunik imaqarnersut takutissagaat, Unammilleqatigiinnermut Nakkutilliisoqarfiup paasisaqarnissaa immaqalu assinginik pissarsinissaa siunertarlugu.

Imm. 2. Suliffeqarfiup suliffeqarfiilluunniit kattuttut paasisutissaataat paasisutissanik nioqquteqartumit avataaneersumit paarineqarpata suliarineqarpataluunniit Unammilleqatigiinnermik Nakkutilliisoqarfiup niuertup avataaneersup suliffimmi iniutai iserfigisinnaavai paasisutissat paasisaqarfigiumallugit assiliumallugillu. Taamaaliorsinnaanermut tunngaviusaaq Unammilleqatigiinnermik Nakkutilliisoqarfik paasisutissanut pineqartunut suliffeqarfimmit suliffeqarfinilluunniit kattutunit nakkutilliilluni misissuiffigineqartunut toqqaannartumik isersinnaatinnagu.

Imm. 3. Unammilleqatigiinnermik Nakkutilliisoqarfiup nakkutilliinnermik misissuinneri taamaallaat pisinnaapput Nunatta Eqqartuuviaata akuersereerneratigut kinaassutsillu uppersareerneratigut.

§ 23. § 22 malillugu nakkutilliilluni misissuisoqarneranut atatillugu Unammilleqatigiinnermut Nakkutilliisoqarfiup qarasaasiatigut paasisutissat nakkutilliilluni misissuinnermut atuumassuteqartut assilisinnaavai, angerlaassinnaallugillu misissuataarnissaat siunertarlugu. Unammilleqatigiinnermik Nakkutilliisoqarfiup suliffeqarfiup initai qimappatigut assilisat parnaarlugit toqqorneqassapput. Nakkutilliilluni misissuiffigineqartup piumasarisinnaavaa nammineq imaluunniit sinniisutut toqqakkami toqqoqqissaakkap ammarnerani najuunissaa aamma Unammilleqatigiinnermik Nakkutilliisoqarfiup atortussanik misissuinnerisa ingerlanerani najuutissasoq. Unammilleqatigiinnermik Nakkutilliisoqarfik pisussaavoq nakkutilliilluni misissuinnerup kingornatigut kingusinnerpaamik ulluinaat 25-it qaangiunneranni paasisutissat assilineri Unammilleqatigiinnermik Nakkutilliisoqarfiup nakkutilliilluni misissuiffigeqartumut tunniutissallugit. Atortussat assilineqartut misissuataarneqareerpata immikkut naqissuserlugit toqqorneqassapput. Atortussat assilineqartut aserortigaassapput Unammilleqatigiinnermik Nakkutilliisoqarfik isumaqarpat suliaq unammilleqatigiinnermut malittarisassanik unioqqutitsisimanermik imaqanngitsoq. Unammilleqatigiinnermik Nakkutilliisoqarfik aalajangerpat suliaq ingerlateqqinniarlugu assilillugit naqitat aserorterneqassapput suliaq inaarutaasumik aalajangiiffigineqarpat.

Imm. 2. Suliffeqarfimmi suliffeqarfinilluunniit kattuttuni pissutsit patsisaallutik ullormi nakkutilliilluni misissuiffioqarfiusumi paasisutissat assilinerat tiguneqarsinnaanngippata Unammilleqatigiinnermik Nakkutilliisoqarfiup niuernermit init parnaarsinnaavai paasisutissallu immikkut naqissuserlugit toqqorsinnaavai ulluinaat pingasut angullugit.

Imm. 3. Imm. 2-imi piumasaasut assigalugit Unammilleqatigiinnermik Nakkutilliisoqarfiup, akuersissummik pissarsisareerneratigut, paasisutissat saqqummersinneqarfimmi pisut assilinnissaat siunertarlugu ilanngullugit tigusinnaavai. Unammilleqatigiinnermik Nakkutilliisoqarfiup atortussat tigusimasai

assilisimasat tiguneranut nalunaarsuiffik ilangullugu paasissutissat misissoqinniurlugit tiguneqarsimasut assilineri ilanngullugit suliffeqarfimmut suliffeqarfinnulluunniit kattuttunut utertillugit tunniunneqassapput Unammilleqatigiinnermik Nakkutilliisoqarfiup misissuinerata kingornatigut kingusinnerpaamik ulluinnaat pingasut qaangiutsinnagit.

Imm.4. Unammilleqatigiinnermut Ataatsimiititaliap imm. 1 aamma 3-mi piffissaliussat immikkut pisoqarneratigut sivitsorsinnaavai.

§ 24. § 22, imm. 1 aamma 2 kiisalu § 23, imm. 1-3 malillugit pisussaaffiit suliarinerini politiit Unammilleqatigiinnermik Nakkutilliisoqarfimmut ikiutissapput.

§ 25. Unammilleqatigiinnermik Nakkutilliisoqarfik nunat allat unammilleqatigiinnermut pisortaannut paasissutissanik ingerlateqqiissinnaavoq Unammilleqatigiinnermik Nakkutilliisoqarfiup nipangiussisuttaaneranut ilaasunik, nunat taakkua unammilleqatigiinnermut inatsisiminnik atoritsinerata siuarsarneranut tunngasunik, tamatumani ilanngullugu naalagaaffeqatigiinnerup iluani nunat marluk arlallilluunniit akornanni pisussaaffinnik Kalaallit Nunaata naammassinninnissaa siunertaralugu.

Imm. 2. Nunani allani unammilleqatigiinneq pillugu pisortanut paasissutissanik ingerlatitseqqiinnermi Unammilleqatigiinnermik Nakkutilliisoqarfiup paasissutissat makku piumasaqaatigissavai:

- 1) tiguisup taamaqataanik nipangiussisussaataanerata ataaniittut,
- 2) taamaallaat siunertamut nunat marluk arlallilluunniit isumaqatigiissutaannut atuuttumut aalajangersagaasoq, paasissutissanik paarlaateqatigiinneq tamatuminnga tunngaveqarpat, aamma
- 3) taamaallaat allanut ingerlateqqinneqarsinnaasoq Unammilleqatigiinnermik Nakkutilliisoqarfiup ersarissumik akuersineratigut siunertamullu akuersinnermut tunngasuinnarmik atorneqartussatut.

Imm. 3. Naalakkersuisut Unammilleqatigiinnermik Nakkutilliisoqarfiup paasissutissanik unammilleqatigiinneq pillugu Inatsisartut inatsisaanni nipangiussisissutaanermut ilaasunut nunat allat ingerlatitseqqissinnaanerata pillugu sukumiinerusunik malittarisassorsinnaavoq.

Kapitali 8

Naammagittaalliorneq

§ 26. Unammilleqatigiinnermut Ataatsimiititaliap Inatsisartut inatsisaa malillugu aalajangigai pisortanut allaffissornikkut oqartussaasunut allanut suliassanngortinneqarsinnaanngillat.

Imm. 2. § 2, imm. 1., § 3, 1.pkt., § 4, imm. 1, § 6, imm. 1, § 7, imm. 1-3, § 8, imm. 1, imm. 3, 2. pkt, imm. 4 5-milu, § 9, imm. 1, § 11 imm. 1, 4 5-milu, § 12 imm. 1, aamma imm. 6 1. pkt., §14, imm. 1, §15, imm. 4, § 19, § 20, imm. 2 aamma 3, aamma § 35, imm. 3, 2. pkt. malillugit aalajangikkat Nunatta Eqqartuussivianut siullertut suliassanngortinneqarsinnaapput ukunangga:

- 1) Aalajangiifigineqartoq.

2) Suliamut nammineq annertuumik soqutigisaqartoq. Tamannali atuutinngilaq § 20, imm. 2 aamma 3 malillugu Unammilleqatigiinnermut Ataatsimiititaliap aalajangigaanut.

Imm. 3. § 17, imm. 1 malillugu aalajangikkat Nunatta Eqqartuussivianut suliasannngortinneqarsinnaanngillat.

Imm. 4. § 15, imm. 4 malillugu aalajangikkanut suliasannngortitsinerit kinguartitsiffiusinnaapput. Aalangiinerit allat pillugit suliasannngortitsinerit allat Unammilleqatigiinnermut Ataatsimiititaliap imaluunniit Nunatta Eqqartuussiviata kingusinnerusukkat sunniuteqartissinnaavai.

§ 27. Aalajangikkat Nunatta Eqqartuussivianut suliasannngortinneqartut tunniunneqassapput aalangiineq pineqartumut nalunaarutigineranit kingusinnerpaamik sapaatip akunneri sisamat qaangiutsinnagit. Immikkut ittumik patsisissaqartillugu Nunatsinni Eqqartuussiviup suliasannngortitsinerimut piffissarititaasup qaangerneqarnera soqutiginniinnassavaa.

Kapitali 9

Pineqaatissiinermik aalajangersakkat il.il.

§ 28. Naalackersuisut imaluunniit tamatumunnga Naalackersuisut piginnaatitaa inuk pinngitsaaliissummik ullukkaartumik imaluunniit sap.akunnikkaartumik akiligassissinnaavaa inuup pineqartup makkua sumiginnarpagit:

1) inatsisartut inatsisaat manna malillugu Unammilleqatigiinnermut Ataatsimiititaliap paaserusutai,

2) inatsisartut inatsisaat manna malillugu peqqussut piumasaqaalluunniit malinneqarnissaat sumiginnarneqarpat,

3) neriorsuut pituttuisunngortitaq malinneqanngippat, takuuk § 20.

Imm. 2. Pisortanut akiitsunik akiliisitsiniartarnerit pinaveersaartitsiniarnerillu pillugit inatsisartut inatsisaat naapertorlugu pinngitsaaliissummik akiliisitsinerit akileqquneqarsinnaapput.

§ 29. Makkunatigut piaarisoaqartillugu imaluunniit mianersuaalliorujussuartaqartillugu akiliisusannngortitsisoqarsinnaavoq:

1) § 6, imm.1-mik unioqutitsisoqartillugu.

2) § 8, imm. 3, 3.pkt, imaluunniit imm.4, 2. pkt. naapertorlugu atugassiissummik unioqutitsisoqartillugu imaluunniit malinninngitsoortoqartillugu.

3) § 11, imm.1-imik unioqutitsisoqartillugu.

4) § 12, imm. 1 malillugu peqqusummik unioqutitsisoqartillugu imaluunniit malinninngitsoortoqartillugu.

5) § 14, imm. 1 malillugu nalunaaruteqartoqanngitsillugu.

6) §19 malillugu peqqusummik unioqutitsisoqartillugu imaluunniit malinninngitsoortoqartillugu.

7) § 20, imm. 1 malillugu neriorsuummik pituttuisunngortitaasumik unioqutitsisoqartillugu imaluunniit malinninngitsoortoqartillugu.

8) § 20, imm. 2 malillugu peqqusummik unioqutitsisoqartillugu imaluunniit malinninngitsoortoqartillugu.

9) § 21 malillugu piunasaqaammik malinninngitsoortoqartillugu.

10) Unammilleqatigiinnermut Ataatsimiititaliamut imaluunniit Unammilleqatigiinnermik Nakkutilliisoqarfimmuq eqqunngitsunik paatsoorneqarsinnaasunilluunniit paasissutissiisoqartillugu imaluunniit suliamut pingaarutilinnik paasissutissanik aallerfissamut nipangiussisoqarsimatillugu.
Imm. 2. Imm. 1, nr. 1 atorneqarneq ajorpoq piffissamit isumaqatigiissutip, suliffeqarfiit kattuteqatigiit imaluunniit periutsit ataqatigiissut § 8, imm. 1 imaluunniit § 8, imm. 4 malillugit Unammilleqatigiinnermut Ataatsimiititaliamut nalunaarutigineqarfianniit aammalu § 8, imm. 1 imaluunniit imm. 4 malillugu Unammilleqatigiinnermut Ataatsimiititaliap aalajangiinnerminik nalunaaruteqarnissaata tungaanut.

Imm. 3. Suliffeqarfik naalagaaffimmit, Namminersornerullutik Oqartussanit, kommuninit imaluunniit kommuninit peqatitigiissunit, kommunit nunaqarfinnilu aqutsisut il.il. pillugit inatsisartut inatsisaannut ilaasunit, tamakkiisumik ilaannakortumilluunniit pigineqartoq unioqutitsisimappat, aammalu aktieselskabi, anpartselskabi, andelselskabi assingusorluunniit unioqutitsisimappata, suliffeqarfik allallu pinerlunneq pillugu inatsit malillugu akisussaataasannaapput. Namminersornerullutik Oqartussat, kommuni imaluunniit kommunit peqatigiissut kommunalbestyrelsit nunaqarfinnilu aqutsisut il.il. pillugit inatsisartut inatsisaannut ilaasut unioqutitsisimappata aamma tamanna atuutissaq.

Imm. 4. Inatsisartut inatsisaat taanna malillugu malittarisassat aalajangersakkat malillugit aalajangersarneqarsinnaavoq piaaraluni imaluunniit mianersuaalliorujussuarnikkut aalajangersakkanik unioqutitsisut akiliisussannngortinneqarsinnaammata.

Imm. 5. Inatsisartut inatsisaat taanna malillugu malittarisassat aalajangersakkat malillugit suliffeqarfik Namminersornerullutik Oqartussanit, kommuninit imaluunniit kommuninit peqatitigiissunit, kommunit nunaqarfinnilu aqutsisut il.il. pillugit inatsisartut inatsisaannut ilaasunit, tamakkiisumik ilaannakortumilluunniit pigineqartoq , aammalu aktieselskabi, anpartselskabi, andelselskabi assingusorluunniit piaaraluni mianersuaalliorujussuarnikkulluunniit unioqutitsisimappata, akiliisitsinissaq pillugu maleruagassanik aalajangersaasoqarsinnaavoq. Kiisalu pineqaatissiinissamut maleruagassaliortoqarsinnaavoq pinerluttulerinnermut inatsimmi piaaraluni imaluunniit mianersuaalliorujussuarnikkut Namminersornerullutik Oqartussat, kommuni imaluunniit kommunit peqatigiissut unioqutitsisimappata, kommunalbestyrelsit nunaqarfinnilu aqutsisut il.il. pillugit inatsisartut inatsisaannut ilaasut.

Imm. 6. Imm. 1 aamma imm. 3-5 malillugit akiliutissannngortitaasut Landskarsimut nakkassapput.

Imm. 7. Akiliinissamut akisussaataaneq ukiut tallimat qaangiunneranni qaangiutereersimassaaq.

§ 30. Niuernikkut kattuteqatigiinnut ilannguniarluni isumaqatigiissuteqarnermigut § 6 unioqutitsilluni iliortoq taakkununga peqataanerminut akiliisitaannngitsorsinnaavoq, qinnuteqartoq siulliulluni pisortanut saaffigiinikkuni paasissutissallu qinnuteqarnerup nalaani pisortat piginnngisaat niueqatigiinnut tunngasut saqqummiullugit. Paasissutissat makkuussapput:

1) Pisortat namminneerlutik nakkutilliillutik misissuinnginneranni imaluunniit pissutsit pineqartut pillugit misissueqquissaannnginneranni pisortanut timitalimmik

nakkutilliilluni misissuinissamut, misissueqqissaarnissamut imaluunniit pissutsit pineqartut pillugit politiinut nalunaarutiginninnissamut periarfissiisoq.

2) Pissutsit pineqartut pillugit pisortat malillugit nakkutilliilluni misissuisimasoq misissueqqissaarsimasorluunniit, niueqatigiit atorlugit unioqqutitsineq pisortanit paasineqarsinnaanngortillugu.

Imm. 2. Akiliisussaataaneq taamaallaat atorunnaarsineqarsinnaavoq qinnuteqartoq:

- 1) suliap suliarineqarnera tamakkerlugu pisortanik suleqateqarpat,
- 2) kingusinnerpaamik qinnuteqaatip tunniunnerani niueqatigiinnut ilaanini atorunnaarsissimappugu, aamma
- 3) niueqatigiinnut allat ilanngunnissaat pinngitsaalisimangippagit.

Imm. 3. Akiliisitaanissap peerneqarnissaanik qinnuteqaammi imm. 1, nr. 1-mi 2-miluunniit piumasaqaatit taaneqartut naammassineqanngippata qinnuteqaat akiliutissap millinissaanik qinnuteqaatitut isigineqassaaq, takuuk § 31, imm.1.

§ 31. Niueqatigiinnermik isumaqatigiisummut ilanngunnikkut § 6 saneqqullugu iliortoq peqataanini pissutigalugu akiliutissaraluaminik ikilisaaffigineqarsinnaavoq imaattoqarpat:

- 1) niueqatigiit pillugit paasissutissat annertunerusumik naleqarnerussutsimut pisortat ilisimasaannit annerusumut tunngatillugu qinnuteqartoq paasissutissiippat, aamma
- 2) § 30, imm. 2-mi piumasaasutut oqaatigineqartut qinnuteqartup naammassippagit.

Imm. 2. Niueqatigiittunut peqataanermut akiliisutissaagaluaq qinnuteqartumut siulliulluni imm. 1-mi piumasaqaatinik naammassinnittumut 50 procentimik appartinneqassaaq. Qinnuteqartumut tullermut imm. 1-mik naammassinnittumut akiliutissaq 30 procentimik appartinneqassaaq. Qinnuteqartunut tullernut imm. 1-mi naammassinnittunut akiliutissaq 20 procentimik appartinneqassaaq.

§ 32. Akiliutissat peernissaannik ikilinissaannilluunniit qinnuteqaatit Unammilleqatigiinnermik Nakkutilliisoqarfimmut tunniunneqassapput. Inuit suliffeqarfiilluunniit pasilligaanerat pillugit suliiani, imaluunniit Unnerluussisut niueqatigiinnikkut unioqqutitsisoqarsorininneq pillugu misissuilereersimappata pineqaatissiissutip annikillinissaanik qinnuteqaat aamma Unnerluussisunut tunniunneqarsinnaavoq.

Imm. 2. Imm. 1 malillugu qinnuteqaat periutsit makku malillugit suliarineqassaaq:
1) Pisorta qarfiup imm. 1 malillugu qinnuteqaammik tigusaqartup tigonera uppernarsarlugu atsiussavaa.

2) § 33, imm. 1 malillugu pisorta qarfik piginnaasaqarluortoq neriorsuuteqarallassaaq § 30, imm. 1-imi imaluunniit § 31 imm. 1-mi piumasaasut naammassineqarsimanersut paasissutissiissutigalugit, aammalu tamatuma nalaani qinnuteqaatip itigartinnissaanut tunngavissaqarnersoq, § 30, imm. 2-mi piumasaasut naammassineqarsorineqanngimmata.

3) Suliamut paasissutissat naliliinerillu naammassineqarpata § 33 imm. 2 malillugu oqartussaaffiup piginnaaneqartup nalunaarutigissavaa qinnuteqartup § 30, imm. 2-mi piumasaasut naammassineqarsimanersut, taamaassimappallu nr. 2 malillugu neriorsuutaagallartut naapertorlugit akiliutissat peernerat ikilineralluunniit pillugit qinnuteqartoq nalunaarfigissallugu.

§ 33. Neriorsuutaagallartoq oqartussa qarfiup qinnuteqaammik tiguisup § 32, imm. 1 naapertorlugu tunniutissavaa. § 32, imm. 2, nr. 2 malillugu oqartussa qarfik neriorsuuteqanngikkallartillugu neriorsuut Unammilleqatigiinnermik Nakkutilliisoqarfiup Unnerluussisullu akornanni oqallisigineqarsimassaq. Akiliuteqartussaajunnaarsitsinissamik taamaallaat neriorsuuteqartoqarsinnaavoq oqartussaasut taakkua isumaqatigiippata.

Imm. 2. § 32, imm.2, nr. 3 malillugu akiliutissaagaluup peerneqarnera Unnerluussisoqarfiup nalunaarutigissavaa Unammilleqatigiinnermik Nakkutilliisoqarfik tusarniaaffigereerlugu pasilligaajunnaarneq oqaatigalugu. § 32, imm. 2, nr. 3 malillugu akiliutissaagaluup appartinneqarnera Unammilleqatigiinnermik Nakkutilliisoqarfik tusarniaavigereerlugu Unnerluussisoqarfiup nalunaarutigissavaa suliaq pineqartoq allaffissornikkut akiliuteqarfissanngortillugu imaluunniit eqqartuussivinnut suliasanngortillugu.

§ 34. Suliffeqarfinnit assigiinngitsuniit pineqaatissiissutit sakkukillinissaannut peqatigiilluni qinnuteqaatit tunniunneqarsinnaanngillat, qinnuteqartut koncernimut atanngippata, qinnuteqaammilu immikkut nalunaarneqanngippat selskabit suut qinnuteqaammi ilaanersut.

Imm. 2. Suliffeqarfimmiit suliffeqarfinniilluunniit qinneteqaatinut ilaaginnarput maannakkut siusinnerusukkullu siulersuisunut ilaasortaasimasut, suleqataasut qaffasissut suleqataasullu allat, § 30, imm. 2-mi piumasaasunik naammassinissimasut. Suliaq naammassillugu paasissutissiissutigine-qareerpat nalilerneqareerpallu § 33, imm. 2 malillugu Unnerluussisut nalunaarutigissavaat inuk pineqartoq § 30, imm. 2-mi piumasaasunik eqqortitsisimanersoq, taamaassimappallu akillisitaanissaq akiliutissalluunniit apparneqarnerat atorunnarssinneqartut nalunaarutigineqassaaq, suliffeqarfik suliffeqarfiilluunniit kattuttut § 32, imm. 2 malillugu neriorsorneqarallarsimanerat naapertorlugu.

Kapitali 10

Atuutilersitsinneq aamma ikaarsaariarneq pillugit aalajangersakkat il.il.

§ 35. Inatsisartut inatsisaat 1. marts 2008-mi atuutilissaaq. Taamaattorli § 17, imm. 3 aamma § 18 atuutilissapput 1. december 2007. Inatsisartut inatsisaata atuutilerneratigut Unammilleqatigiinneq pillugu inatsit nr. 28, 30. oktober 1992-imeersoq atorunnaassaaq

Imm. 2 Unammilleqatigiinneq pillugu Inatsisartut inatsisaat nr. 28, 30. oktober 1992-imeersoq suliat malillugu naammassineqarsimanngitsut Inatsisartut inatsisaata atuutilerneraniit atorunnaassapput. Tamannali atuutinngilaq naammagittaalliutitut kiisalu sulianut eqqartuussivimmiittunut tunngatillugu.

Imm. 3. Unammilleqatigiinnermik killiliisumik isumaqatigiissutit, akuersissutit periutsillu ataatsimut aaqqissukkat Inatsisartut inatsisaata atulernerata nalaani atuuttut aammalu § 6, imm.1 malillugu inerteqqutaasut 1. juli 2008 tikitsinnagu § 8 malillugu suneqannginnissaq siunertaralugu nalunaarutigineqarsimagunik Unammilleqatigiinnermut Ataatsimiititaliap aalajangiinerata kingornatigut qaammatit pingasut tikillugit ataannassapput Unammilleqatigiinnermut

Ataatsimiititaliaq itigartitsigaluarpalluunniit. Qaammatinik pingasunik piffissaliineq
Unammilleqatigiinnermut Ataatsimiititaliap sivitsorsinnaavaa.

Namminersornerullutik Oqartussat, ulloq xx qaammat 2007.

Hans Enoksen

/

Siverth K. Heilmann